

Politica d'economia da las Trais Lias e dal Chantun

■ Il term politica d'economia designescha l'influenza da l'economia tras il stadi che stgaffescha, cun agid da mesiras d'urden politic, las cundiziuns da basa, entant ch'el cumpara, en cas da mesiras d'urden processual, ubain sez sin il margh ubain cun midar en maniera directa las variablas internas da quel. A l'urden politic appartegnan en general la politica da commerzi, da structura e da concurrenza, a l'urden processual la politica finanziaria e fiscalia. Determinants per la politica d'economia en conflicts d'interess publics e privats.

La politica economica en la Republica dal 16avel–18avel tschientaner

Politica da finanzas ed administraziun

La vita economica sa splegava en la Republica da las Trais Lias oravant tut sin il nivel da las vischnancas e dals cumins ch'eran dapi ils Artitgels da Glion dal 1526 en possess da las regalias e ch'eran qua tras cumpetents da relaschar prescripziuns e fixar tributs. Las Lias faschevan en emprima lingia politica da finanzas: en lur Dietas decidevan ellas davart pensius ed annatas e survegliavan la cumpra d'uffizis; ils titulars d'uffizis en las Terras subditas avevan da consegnar suenter il bienni ina part da las entradas da lur uffizi, fixada legalmain, a la Camera dominicale. Quests daners vegnivan normalmain distribuids a las vischnancas. En buns onns eran quai a l'entschatta dal 18avel tschientaner passa 40 000 fl., per finir fin a 60 000. Cun ils imports anc pli impurtants per l'acquist d'uffizis communs e giudizials tegnevan questas entradas las taglias sin ils fieus ad in nivel fitg bass u rendevan talas nunnecessarias. Betg darar pajavan pussanzas estras grondas summas per garantir la loialtad da las autoritads u cuntanscher in tschert resultat tar referendums.

L'administraziun (minimala) da la Republica sa finanziava sasezza. In'atgna funtauna da finanzas eran ils dazis sin bains d'import e da traffic e transit. Ils dazis a Clavenna ed en la Vuclina faschevan bunamain dus terz da las entradas statalas. In'administraziun ordinada da la cassa statale possede la Republica pir dapi la mesadad dal 18avel tschientaner; ils (paucs) affars finanzials vegnivan procurads fin a quel mument da perits da la citad da Cuira.

Politica da duana

La politica da duana vegniva, pervia da las tariffas, savens en conflict cun la politica da transit. Ella ha era prolungà suenter ils Scumbigls grischuns la crisa en il commerzi da transit. Per tuttina attrair ils commerziants sur ils pass grischuns vegnivan accordadas reducciuns da dazi oravant tut a Turitg, Son Gagl, Lindau, Milaun e schizunt a l'Ollanda. Las Trais Lias faschevan però a medem temp de-

pendent quest privilegi da l'utilisaziun esclusiva dals pass grischuns, quai che n'era betg pussaivel. La politica da duana era medemamain in med da pressiu politic da las pussanzas da l'exteriur: cunquai che la Lombardia era d'impurtanza vitala per il provediment cun graun e per la vendita da muvel dal Grischun, ha Milaun laschà creditar per scrit privilegis substanzials. Questa dominanza economica da Milaun è sa manifestada fin il 1700 en la preschientscha d'in ambassadur spagnol. Las Trais Lias e la Dieta eran en discordia concernent la politica visavi Milaun, Vaniescha e Puntina en consequenza da conflicts d'interess tranter las differentas faciuns. Cunquai ch'ins aveva però da garantir primarmain il provediment dal pajais, furmavan la facilitaziun da l'export da muvel e da l'import da graun e sal da tuts temps ina part essenziala da las tractativas e dals contracts cun quels pajais vischins. En la politica finanziaria èn las autoritads adina sa stentadas da reducir a moda speditiva eventuals daijets e da garantir la cumpetitivitad da la valuta grischuna, e quai cun fixar regularmain ils curs da stgomi e cun intervegnir en la regaglia monetara en cas d'ina produzzion excessiva da daners u en ina produzzion da daners da pauca valor.

Economia marcada da monopols e concessiuns

Ina promoziun directa da l'economia sa manifestescha pir cun la subvenziun da construcziuns da vias a l'entschatta ed a la fin dal 18avel tschientaner. Quella promoziun s'exprimeva en in augment da las cifras sin il champ dal transit. Envers Vaniescha han las Lias empruvà da segirar vinavant il permiss da lavur e da dimora accordà als emigrants artisans e commerziants grischuns.

Da la politica d'occupaziun faschevan naturalmain era part ils contracts uffizials concernent il sold e la lubientscha concedida a privats da recrutar mercenaris. Quests contracts reflecteschan las mesiras fiscalas, politicas e commercialas da las Trais Lias – ed ina buna purziun politica d'interess da las elites e da lur clientella en ils cumins e vischinadis. Ina libertad economica generala na regnava betg, malgrà tutta declamaziun: Cuira ha, cun sias prescripziuns severas imponidas a las mastergnanzas, eliminà la concurrenza estra e la gronda part da las vischnancas ha cuntanschi il medem tras lur pratica da naturalisaziun u tras prescripziuns restrictivas. La structura fundamentala da l'economia era corporatistica e marcada da monopols e concessiuns. La pauca libertad pratica da commerzi e mastergn era d'engraziar a l'incapacitad da las autoritads da controllar u a la discordia tranter ils partenaris economics.

La politica economica en il 19avel e 20avel tschientaner

Agricoltura ed economia publica

La perdita da las Terras subditas (1797), ch'eran da grond'impurtanza per l'economia e la politica da traffic sco era per l'integrazion dal Grischun en la Confederaziun, ha rinforzà l'orientaziun vers il nord e la politica economica nazionala (svizra). A l'entschatta dal 19avel tschientaner ha conferì il Moviment economic tras referats e postulats publicgads en il «Neuer Sammler» ils emprims impuls ad ina politica agrara chantunala. Ses exponents han pretendi – cun pauc success – refurmas fundamentalas en l'agricultura. Per la scolaziun professiunala dals purs stevan bain a disposiziun dapi il 1832 contribuziuns chantunales, ina scola professiunala planisada n'ha però betg pudì vegnir realisada. Il 1869 è vegnì introducì (cumpensatoricamain) in curs agricul obligatoric al Seminari scolastic a Cuira ed a partir dal 1870 han ins organisà era en las regiuns curs da perfecziunament. La Constituziun chantunala revedida il 1880 cunteneva per l'emprima giada in artigel davart la promoziun da l'agricultura; il sustegn finanziar real era dentant fitg modest, perquai ch'i vegnivan pajadas oravant tut contribuziuns per muvel premià (per daplina tanschevan ils daners betg). Sin il plaun federal ha l'emprima lescha davart la promoziun da l'agricultura effectua il 1844 cun in uffizi correspondent in sustegn pli ferm da quel sector. La donaziun dal «Rushof» al chantun Grischun tras Rudolf Alexander von Planta ha pussibilità il 1896 la fundaziun da la scola da purs Plantahof a Landquart. En il 20avel tschientaner han la Confederaziun ed il Chantun investì pli e pli era en las meglieraziuns dal terren e, per franar il regress da la produzzion da graun, en la cultivaziun dad ers en regiuns autsitudas (premijs da moler).

La notorica mancanza da daners dal Chantun ha impedi quel da promover u intradar svilups giavischabels en l'economia publica. Mo sin il champ da la construcziun da vias han ins fatg gronds progress, da maniera ch'igl existiva fin il 1900 in imposant sistem da vias artificialas che cuvriava tut las valladas. Il progress promovì qua tras en las valladas grischunas è dentant restà concentrà en in'emprima fasa sin paucs centers turistics.

Viafier, economia d'aua e novas industrias

Ina promoziun da l'industria tras il stadi ha ditg strusch gi lieu. L'interess da la politica uffiziala sa drizzava a l'agricultura ed al turissem sco era a la Viafier da las Alps Orientalas, in project ch'ha dentant succumbì a la Viafier dal Gottard. Sco sin il champ social (tras Clement Loë, Anna von Planta e.a.) han ins cuntanschi a la sava dal 20avel tschientaner era en quest sector ils vairs progress mo grazia ad iniziativa e fi-



En il decurs dal 20avel tschientaner èn gronds projects industrials vegnids pli e pli en conflict cun la protezzion da la patria e da la natira. (Broschura dal 1943 davart in'ovra idraulica che n'è la finala betg vegnida realisada).

nanziazions privatas sco era, per exempel en la construcziun da viafiers, tras l'engaschament dals pioniers Sebastian Hunger (Grischun Central) e Willem Jan Holsboer (Landquart-Tavau). Per cletg ha il pievel consentì il 1897 a la lescha davart la viafier ed ha creà qua tras il fundament per la construcziun autonoma da la Viafier retica; la Confederaziun ha contribuì en quel grà ch'ella ha signà il 1898 accias per ogt milliuns francs. Circuls privats han alura era intimà il chantun Grischun da far ina politica activa en l'economia d'aua: il 1906 è naschida l'emprima lescha chantunala davart il dretg da las auas. L'Emprima Guerra mundiala ha dentant destrui las speranzas en in svilup positiv da l'economia publica en il Grischun ed a chaschun dal scandalus naufragi da las Ovras electricas grischunas SA (en possess dal Chantun) il 1923 han il Chantun e las vischnancas subì perditas da milliuns. Cun quai era sa disqualifitgà il Chantun per decennis sco interpretider. Il 1945 ha il legislatur stgaffì (finalmain) il fundament per eventuals levgiaments fiscals e credits per la promoziun da novas industrias, ma quai ha midà pauc vi da la mancanza d'attractivitat dal Grischun durant la fasa da l'expansiun industrial; la situaziun disfavouraivla dal punct da vista dal traffic, la chargia fiscal elevada e la mancanza da persunal qualifitgà eran nauschs trumfs.

Center da servetschs e novas sfidas

En il suenterguerra è sa sviluppà il stadi cuntinuadamain ad in center da servetschs, e l'apparat administrativ è vegnì amplifitgà correspondentamain. Il stadi aveva en emprima lingia da procurar per l'avertura dal traffic, da sustegnair la construcziun dad ovras electricas, da promover l'amplificaziun dal champ da scolaziun ed educaziun sco era d'auters secturs publics e da stgaffir, cun metter a disposiziun ils meds finanzials necessaris, cundiziuns da basa favuraivlas per l'avegnir (agid a l'agricultura da muntogna, introduzzion da novas industrias, promoziun dal turissem e.a.). Cun quai dueva era vegnir franada l'emigraziun da la generaziun pli giuvna. Prioritad avevan en pli il rinforzament finanziar ed organisatoric da las vischnancas. Sco impurtanta no-

vaziun ha acceptà il pievel il settember 1956 la lescha davart la perequaziun finanziaria. Enturn ils onns 1960 ha sveglià la politica da traffic e dad esters, proseguida sin plaun federal, grevs conflicts. Entant ch'il Grischun sa sentiva gia adina dischavantagià en dumondas da traffic, veseva la Regenza grischuna era en la limitaziun lineara da las forzas da lavur estras en l'entira Svizra in impediment per l'agen svilup economic. Suenter il 1973 è la creschientscha economica generala sa diminuida en consequenza da la crisa da l'iel, ed a partir dal 1985 èn s'agijuntads anc ulteriurs problems, numnadamain quels da l'ambient (muria dal guaud, polluziun da l'aria, midada dal clima e.a.). La protezzion da l'ambient ha influenzà en consequenza tut ils affars guvernamentals ed en particular ils projects centrals dals onns 1990: la cumplettaziun dal plan directiv chantunal (1991) e l'elavuraziun da la planisaziun directiva regionala orientada a quel (1992). Finalmain ha era l'augment da la dischoccupaziun fatschentà pli e pli las autoritads grischunas, era sche la quota da dischoccupads è adina remartglamain sut la media svizra. Ils duairs multifars dal stadi modern sin il champ da l'assistenza sociala pretendan meds finanzials adina pli auts. Il 1955 importavan las expensas dal quint administrativ ordinari anc 55,3 miu. frs, il 1980 gia 618,2 miu. frs ed il 2009 2,375 mia. frs. Pli problematic è il debit betg cuvert che resulta da la differenza tranter meds finanzials esters e la facultad statale. Il maun public sa senta en princip sfurzà da far ina politica conjuncturala anticiclica, per ina tala mancanza però per ordinari ils meds cun in effect durabel sin la conjunctura. Adolf Collenberg

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.



Sur lung temp èn las Terras subditas stadadas muntada vitala per l'economia da la Veglia Republica.

DESIGN DA
GOTTFRIED STADLER, 1643